

Naalackersuinikkut ingerlatsisut partiit naatsorsuutaasa tamanut saqqummiunneqartarneri pillugit Inatsisartut inatsisaat nr. 15, 22. november 2011-meersoq

Naalackersuinikkut ingerlatsisut partiit naatsorsuutaat

§ 1. Partiit, Folketingimut imaluunniit Inatsisartunut kingullermik qinersinermi Kalaallit Nunaanni qinigassanngortitsisimasut partiip nuna tamakkerlugu kattuffiata isertitai aningaasartuutaalu pillugit ukiut tamaasa ukiumoortumik naatsorsuutunik saqqummiussisassapput. Isertitat assigiinngitsut makku pillugit paasissutissanik ukiumoortumik naatsorsuutit imaqassapput:

- 1) Pisortaniit partiimut tapiissutit.
- 2) Ilaasortat akiliutaannit isertitat.
- 3) Aammattaarlu inuinnarnit akileeqaataassutit.
- 4) Nunani tamalaani suleqatigiiffinnit, inuinnaat ataatsimoorussamik peqatigiiffiinit, suliatigut kattuffinnit, inuussutissarsiorlut suleqatigiiffiinit, inuussutissarsiorluni suliffeqarfinnit, aningaasaateqarfinniit peqatigiiffinniillu akileeqaataassutit.
- 5) Ernianit isertitat.

Imm. 2. Partii ukiumi naatsorsuiffimmi akiliuteqartumit ataatsimiit akileeqaataassummik imaluunniit akileeqaataassutunik arlalinnik katillugit 10.000 kr.-inik amerlanerusunik pissarsisimappat akiliisup aqqa najugaalu ukiumoortumik naatsorsuutinit takuneqarsinnaassaaq. Kinaasutsiminnik nalunaaruteqaratik akiliuteqartumit akileeqaataassutit tamarmiusut annertussusaat pillugu paasissutissanik aamma 10.000 kr.-it sinnerlugit kinaasutsiminnik nalunaaruteqanngitsumit ataasiakkaanit akileeqaataassutit annertussusaat pillugit paasissutissanik aamma ukiumoortumik naatsorsuutit imaqassapput.

Imm. 3. Ukiumoortumik naatsorsuutit oqimaaqatigiissitsineq aamma nammineq aningaasaatit pillugit paasissutissanik imaqassapput.

Imm.4. Ukiumoortumik naatsorsuutit ilassutitut nalunaarsukkatut partiip nuna tamakkerlugu kattuffiata § 4 malillugu pissarsiarisimasaanik paasissutissanik imaqassapput.

§ 2. Ukiumoortumik naatsorsuutit partiip aqutsisuunit atsiorneqassapput aamma ukiumoortumik naatsorsuutini allanneqarsimasunik partii allanik isertitaqarsimanngineranik ani-ngaasartuuteqarsimanngeranilluunniik nalunaarummik imaqassallutik.

§ 3. Ukiup naatsorsuiffiusup naaneraniit kingusinnerpaamik qaammatit arfinillit qaangiutsinnagit partii ukiumoortumik naatsorsuutunik Inatsisartunut nassiussissaaq. Ukiumoortumik naatsorsuutit Inatsisartut Siulittaasooqarfiata tamanut saqqummiutissavai.

Immikkoortortaqarfiit aamma inuusuttut immikkoortortaqarfiit paasissutissiisussaataitanerat

§ 4. § 1, imm. 1-mi ilaasup partiip immikkoortortaqarfia imaluunniit inuusuttunut immikkoortortaqarfia ukiumi ilivitsumi § 1, imm. 1, nr. 3-4-mi taaneqartunik akileeqaataassutunik, katillugit 40.000 kr.-inik amerlanerusunik tigusaqarsimappat, immikkoortortaqarfik ukiup ilivitsup naaneraniit kingusinnerpaamik qaammatit sisamat qaangiutsinnagit partiip nuna tamakkerlugu kattuffianut makku pillugit paasissutissanik nassiussissaaq:

- 1) Akileeqaataassutit tamarmiullutik annertussusaat.
- 2) Akileeqaataassutsip ataatsip annertussusaa, akileqaataasup aqqa najugaalu allallugit,

immikkoortortaqarfik akileeqataasumit ataatsimiit akileeqataassummik imaluunniit akileeqataassutininik arlalinnik katillugit 10.000 kr.-inik amerlanerusunik pissarsisimappat.

3) Kinaassutsiminnik nalunaaruteqanngitsunit akileeqataassutit tamarmiusut annertussusaat.

4) Kinaassutsiminnik nalunaaruteqanngitsunit ataasiakkaanit tamanit ataasiarluni akileeqataassutit 10.000 kr.-inik amerlanerusut annertussusaat.

Pineqaatissiinerit, atulersinnera il.il.

§ 5. Akiliisitsisoqarsinnaavoq:

1) § 2, § 3, imm. 1 aamma § 4 unioqputinneqarpata.

2) §§ 1 aamma 4 malillugit paasissutissanik eqqunngitsunik amigateqartunilluunniit tunniussisoqarpata.

3) § 2 malillugu eqqunngitsumik nalunaaruteqartoqarpata.

Imm.2. Inatsisartut inatsisaat akiliisitsinissamut tunngavissiippat Kalaallit Nunaanni pinerluttulerinermik inatsimmi inatsisitigut pisussaataasup pisinnaatitaasullu akisussaaffia pillugu maleruagassat malillugit partiip kattuffia akiliisinneqarsinnaavoq.

§ 6. Inatsisartut inatsisaat ulloq 1. januar 2013-mi atulersinneqarpoq.

Imm. 2. § 1 malillugu naatsorsuutit 2013-mut ukiumut naatsorsuiffik pillugu siullermeertumik nassiunneqassapput.

Namminersorlutik Oqartussat, ulloq 22. november 2011

Kuupik Kleist